

Ямде лий



0+

1933 ий 1 февраль годсек лектеш.

Йоча газет – тўн полыш калыше



Авторын фотожо.

Ялысе калык дене палыме лийме, йочашамычлан «Ямде лий» нерген палдарыме, кылым кучаш, возаш кумыландыме шонымаш дене Марий Турек район Сысоево школы полатыште латкум ял гыч 74 ўдыр-рвезе тунемеш. Тўрлў конкурсышто, спортышто вийыштым тергат. Районышто веле огыл, республикыштат сенгышыш лектыт. Теве 6-шо классыште тунемше Катя Бабакина – тале ечызе. Тудын медальжым шотлаш парня ок сите. 8-ше класс гыч Карина Тихонина ден Саша Орлова чыла «визытанлан» тунемыт. Нунылан шымлыме пашам эртараш, тўрлў проектым возаш келша. Ты классыштак тунемше Алексей Жмакин да 7-ше класс гыч Петр Акпатырев спортлан шўман улыт. Футболла, баскетболла модыт, физкультур дене олимпиадыште уш-акылыштым, вийыштым тергат. Сысоево школын эн чолга ўдыр-рвезыже-влакым снимкыште ужыда.

– *Ме кажныже шке шонымашан, тўрлў койыш-шоктышан улына гынат, шочмо йылмым пагалымына иктеш уша. Марий йылме урок чыланнан эн йўратыме. Тудым Эльвира Леонидовна Смоленцева вўда. Урокишто «Ямде лий» газет – тўн энгертышна. Туныктышылан улыш семын газетеш савиктыме урок моткоч келша. Йоча-влакын заметкылаштым пырля шергалына, – ойлат ўдыр-рвезе-влак.*

Шўртньў шондык

«Ямде лий», палет, тый жап дене тўр ошкылышо газет улат. Ожнырак шемалгырак тўсан, вичкыжрак коман лийынат гын, кызыт сылнештынат да кўжгемынат. Кидыш налын, он пелен ўндаламат, юзо вийым шижам. Тый моткоч мудреч, пагалыме айдеме гай улат. Эн тўнжў – марий калыкын акрет годсо, кугезе коча-кован шўртньў шондыкшо. Мыняр шуко илет, тунар шуко палет, йолташ-влакым чумырет. Жапленыт тыйым ожнат, пагален илат тачат. Мый тый денет ончыкыжымат кылым кучаш, лудын шогаш, илышет эскераш ямде улам!



Волжский, Памар.

Дарья ПЕТРОВСКАЯ.

Е.ИВАНОВА.



«Самоцветы» икымше



Е.БУШУЕВАН фотожо.

14-15 январьште Москошто «Московское время-2023» тўнямбал конкурс-фестиваль эртаралтын. Тушто йоча да самырык-влак мурымо, куштыммо усталыкштым тергенит. Йошкар-Оласе 6-шо номеран йоча сымыктыш школ пеленысе «Самоцветы» хореографический ансамбль 10-12 ияш-влак коклаште мастарлыкше дене ойыртемаптын. Калык да классике куштымаш тагнаслаште икымше верым

сенген налын. Ансамблым пӧлек да диплом дене палемденит **(снимкыште)**.

– *Конкурсшко 12 ияш 23 йочам намиенна*, – ойка классике куштымашым туныктышо Е.А.Бушуева. – *Кажне тагнасыште кок куштымашым ончыктеныт. Калык куштымашым туныктышо Наталия Геннадьевна Васильева да мый йоча-влакын сенымашым денек кугешнена.*

Л.ГРИГОРЬЕВА.



Тўзлане, ялем!

Ялем Шора энгер воктене верланен. Тудым марлаже Унчо, рушлаже Шоруньжа манит. Ялыште кевыт, клуб улжит. Йоча-влаклан модаш площадкым келыштарыме. Йолташ-шамыч дене тушто чўчыкдын погынена. Мый Унчо ялын эн мотор уремыштыже илем. Тудо поэт Валерий Апкаевын лўмжым нумалеш. Шукерте огыл «Мастар марий» лўман кевытым почынит. Шочмо ялемым моткок йӧратем.

Сабрина АКСЮБИНА.

Морко район.

Калык шарна


МАССР-ын калык поэтше Н.И.Казаковын 105 ияш лўмгечыжым Кўчыкэнгер ялысе тоштерыште палемдышна. Пошкудо-влак погынен тольыч. Энгерсола школын тунемшыже-шамыч **(снимкыште)** поэтын сылне почеламут аршашлаж дене куандарышт. Шочмо марий йылмым да литературым туныктышо Э.В.Александрова Николай Ивановичым ужмыжо, почеламутшым лудмыжым колыштмыж нерген шарналтыш.

10 февральште Морко посёлкысо М.Н.Янтемир лўмеш тоштерыште «Казаков лудмаш» районысо пайрем-конкурс эртаралтеш.

Людмила Курсова калык поэт нерген шуко поро шомакым ойлыш. Уста поэтым ял калык шарна, тугеже тудо ўмыреш ила.

Г.СОШИНА.

Морко район.



Фотом тоштерын архивше гыч налме.

Российысе увер

Моско оласе Сенгымаш тоштер «Школьный музей Победы» всероссийский проектым увертарен. Тушко школ тоштер-влак ушнен кертыт. Schoolvictorymuseum.ru сайтыш йодмашым колтен, рўдоласе музейын партнёрге лияш йӧн уло.

Кумылан кажне ег «#Буклук_2023» регион-влак кокласе фотоконкурсш ушнен кертеш. Йӧратыме книга дене сылне композицийым ыштен, моторын войзыман. Тўрыс увер – koroleva.blogs.donlib.ru сайтыште.

Ўдыр-рвезе-влак, «**Легенды России**» всероссийский конкурсшко ушныза. Сўретым сўретлыза да туштом ончыктымо нерген серыза. Пашам legendy-rossii@mail.ru адрес дене электрон почтыш **1 февраль марте** колтыза.


Марий Элысе увер

Марий Элысе школлаште «**Урок цифры**» акция **5 февраль марте** эртаралтеш. Тушто ўдыр-рвезе-влак игече нерген ончылгоч палдарыше технологий-шамыч дене палыме лийыт. Урокцифры.рф сайтыште тўрлӧ видеом ачава-влакат ончен кертыт.

21 февральште, Шочмо йылмын тўнямбал кечынже, Марий Элыште идалыкын шомакшым ойырат. Кажне ег шке мутшым теллен кертеш. Келшыше шомакым mariword@lenta.ru адрес дене электрон почтыш **31 январь марте** колтыман.

Йошкар-Оласе Телевидений школын тунемшыже **Любовь Яковлева «Пушкин знает!»** всероссийский конкурсшто сенгышыш лектын. Оксам чын кучылтмо шотышто руш произведенийым ик минутышто лончылаш кўлын. Тудлан Э.Успенскийын «Простоквашино» ойлымашыже полшен.

Газет кугу корныш луктеш



Кажне гаяк икшыве школышто тунеммыж годым «Ямде лийыш» воза. Йоча газет ятыр еглан сылнымут тўняшке корным почеш. «Ямде лийын» эртарыме тўрлў конкурсышко, слётышко ушнен, мыняр йоча усталыкшым виягда, шинчымашыжым келгемда, калык ончылно шкем ўшанлын кучаш тунемеш!! Нунын кокла гыч иктыже – марий мурызо Алина Семёнова (Макарова) (снимкыште). Тудын дене юнкор жапыш уэш пўртылна.

– Алина, «Ямде лий» дене кунам палыме лийынат?

– Сотнур школышто тунеммем годым «Ямде лийым» кидышкем икымше гана кученам. Тунам газет эше тўрлў тўсан лийын огыл. Чолга юнкор-влакын пашаштым куанен лудынам. Сылнымут дене кылым кучаш туныктышына Анатолий Александрович Сапаев кумыланден. Урок деч вара юнкор кружокыш коштынна. Газетеш ятыр почеламутем савыкталтын. Мый моло йоча семянак ава, пўртўс нерген возаш тыршенам. Тунам ны размерым, ны рифмым пален омыл. Туныктышына тўрлаш полшен. Савыкталтше почеламутем-влакым газет гыч пўчкеден луктынам. Нуным кызытат аралем.

– Чолган возкален шогыметлан тыйым «Марий юнкор» слётышко ўжыныт.

– Туге. Тўрлў район да республикла гыч чолга

юнкор-влакым иквереш ушышо слётышко логалаш мыланемат пиалшыргыжалыны. Эсогыл кок гана миеанам. Тушто шуко йолташымы муынам, серызе-влак дене вашлийын, урок сынан занятийлаште шинчен, шинчымашемым пенгыдемденам, сылнымут дек утларак шўмангынам.

– Тый почеламутым эн сайын возышо автор семын Антонов Ивук лўмеш премий дене палемдалтынат. Тиде пагытым кузе шарналтет?

– Тиде 2010 ийыште лийын. Мыланем кубок ден дипломым кучыктеныт. Нуным кызытат аралем да



кажне гана ончалме годым юнкор жапыш уэш пўртылам. Икана Алана ўдырем ужын да коваж деч йодын: «Статуэткым кў пуэн?» Тудыжо вашештен: «Ават конкурсышто сенен. Почеламутым возымыжлан пўлекленыт». Алана изи гынат, почеламутым рушла возаш тырша. Тидыже пеш куандара. Кугурак лиймекышт, ўдыремымат, эргымымат марий йылмылан кумыландаш шонем.

– Тый кызыт марий эстрадашты палыме улат. Кугу корнышко лекташ «Ямде лий» газетат полшен, очыни.

– Газет дене кылым кучымамлан ик ганат ўкынен омыл. Сылнымутышко икымше ошкылым ышташ, шинчымашым келгемдаш йўным ыштен. Иктаж 7-ше классыште тунеммем годым икымше мурем лектын. Мутшым шкеак возенам. Кызытат мурылан шомакым шкеак серем. «Ямде лийлан» тауштен илем.

Х.АЛЕКСАНДРОВА
мутланен.

Фотом еш архив гыч налме.

Блендер Купсолам сийла

«Ямде лийын» поро йолташыже-влак, 2023 ийын икымше пелийжылан газетлан возалтме тургым мучашке лишемын. Те почто, почталъон, интернет гоч подпискым чолган ыштенда. Квитанцийым але тудын копияжым редакцийышке кугу ўшан дене колтенда. Тендан коклаште лотерей модышым эртарен, сеныше-шамычым ойыренна. Пиалан ен-влаклан сурткўргыштў кучылташ, модаш, уш-акылым виягдаш келшыше пўлек-шамыч логалыныт.



Пўлек-влакым 1 апрель марте налын шуктыман.

Виса – **Ф.Ф.Муртазин** (Медведево, Руэм посёлко). Киндерке – **Е.В.Григорьева** (Морко посёлко). Раскраске – **А.В.Рыбаков** (Шернур,

Лавраэнер). Гуашь – **А.Н.Алмаметова** (Шернур, Кандрач починга). Книга набор – **И.В.Бондаренко** (Оршанке, Кугунур), **Т.В.Соловьёва** (У Торъял, Токтарсола). Волгалтарыше отвёртко – **Л.Ю.Сергеева** (Морко, Изи Кушна). Графин – **В.В.Никитин** (Шернур, Койсола). «Пырыс» светильник – **Г.В.Степанова** (Морко посёлко). Ўстембал модыш –

Н.Е.Степанова (Волжский, Нурсола). Алмаз мозаике – **А.В.Шарабуева** (Шернур, Куэрсола). Плед – **З.Ф.Загайнова** (Советский, Шўдысола). Салатнице – **Р.М.Иркина** (Башкортостан, Шаран, Уял). Пластилин гыч

сўретлаш сўрет – **М.А.Овечкин** (Шернур, Кугу Торешкўвар). Лотерейын учредительже –

«Ший памаш» сылнымут фондым вуйлатыше, серызе **В.В.Краснов**. Тудлан кугу таум ойлена.

Тўн приз – блендер – Шернур район Кукнур Купсола гыч А.А.Тойшевалан логалын.





Сенгаш уш-акыл күләш


Спортышто ончылно лияш вий, пенгыде капкыл веле огыл, пүсө уш-акылат күләш. Тидым Параньга школын 11-ше классыштыже тунемше Дарья Харитонова (снимкыште) раш пала. Чолга ўдыр 5-ше классыште тунеммыж годымак спорт дене кылым кучаш тўналын. Тидлан Усола школын тренерже М.А.Богдановлан да Мария акажлан таушта.

Дашан сенгымашыже куд ий жапыште ятыр погынен. Спорт ориентирований, спорт туризм дене районысо, республикысе, регион-влак кокласе тагасымашлаште мыняр пўжвўдым йоктарен, мыняр ментгым эртен! Шотлен от пытаре!

– Республикысе таңасымашке визымше классыште тунеммем годым миенам. Мыланем оңай да тыгодымак лўдыкшў лийын. Ориентирований-лабиринтыште виемым терген, кумшо верым сенен налынам. Умбагыже тыршаши кумылем утыр ылыжын, – оила ўдыр.

Чолга спортсменын грамот ден дипломжо-влак ятыр улыт. Пырдыжыштыже кумло медаль волгалт кеча. Дарья капкылжым кажне кечын шуара, уш-акылжым пойдара. Йолташыже-влак дене пырля шошым, кенечым куржталыт, телым ече дене коштыт.

Дарья «Лўдыкшыдымылык школ» россияысе йоча да самырык-влак мер толкынын эртарыме тагасымашлаштат команде дене вийжым терген. «Развивайся с нами» регион-влак кокласе дистанционный тагасымаште шукерте огыл сенышыш лектын. «Лўдыкшыдымылык школ» толкынын 2022 ийыште эн сай участникше» йўклымаште чыланыштым ончылтен. Ятыр гана ончылно лиймылан тудым Марий Элын сборныйышкыжо налыныт.



Фотом еш архив гыч налме.

– Ўдыр-рвезе-шамыч, яра жапдам кузе эртараш огыда пале гын, спортсмен-влак радамышке ушныза, – оила Даша.

Х.ГЕННАДЬЕВА.



Фотом интернет гыч налме.

Мастарлыкем шуарем

Йоча да самырык-влаклан «Роза ветров» рўдерын эртарыме «Шуаралтса мемнан дене пырля» дистанционный тагасымаште виемым тергенам. Тўрлў заданийым ыштен, мастарлыкем шуаренам. Шуко ум да күләшаным пален налынам. Эн пайдалылан тўрлў кылдышым тунеммым шотлем. Физкультурым туныктышо Людмила Николаевна Семёновалан тагасымашке ушнаш кумылангыдымыжлан таум ойлем.

Эрвина МИХАЙЛОВА.

Марий Турек, Арбор.

Кўкшў лектышым ончыктеныт

Грек-рим кучедалмаш дене Волжск олесе спортшколын воспитанникше-шамыч (снимкыште) регион-влак кокласе турнирыште кўкшў лектышым ончыктеныт. Тагасымаш Татарстан Республикысе Бугульма олаште эртаралтын. Артём Грецов, Дмитрий Дерябин, Матвей Колениченко, Егор Данилов шке ийготанышт-влак коклаште икымше лийыныт. Константин Иринов ден Алексей Кудрявцев ший медальым сенен налыныт.

Л.НИКОЛАЕВА ямдылен.

Спортлан шўман

Мый кумшо классыште тунемам. Ачам Москошко пашаш коштеш. Авам самырыкше годым спорт дене пенгыде кылым кучен. Сенгымашыжат ятыр лийын. Тидын нерген медальже ден грамотшо-влак палдарат. Садлан кызыт спорт дене кылдалтше телепередачылам ончаш йўратена, спорт тагасымашлашке ушнена. Мый ече ўмбаке кумылын шогалам. Мече почеш куанен куржталам.

Никита КРЫЛОВ.

Морко, Коркатово.

Кидешышт пу илана

Марий калык кидпашалан ожнысек уста: шун гыч мастарын менча, күртным моштен тапта, пу гыч могай гына арверым огеш ямдыле. Ёстел, пүкен, совла, күмыж, окнасерга да молат пу гыч ыштыме лийыныт. Тылеч посна кайыкым, яныкым пу гыч пүчкын луктыныт. Нуно суртым сорастарен веле огытыл, осал вий дечат араленыт. Мутлан, вуйволакеш имным пижыктеныт. Тудо пörтын, ешын, тукумын пиалан илышышлан мутым кучен. Марий-влак кызитат пу гыч түрлө арверым ямдылат. Тидлан самырык тукумымат кумылангат. Тыгай суапле сомылым Медведево районысо йоча усталык пörтыштö А.А.Абатин (снимкыште — йоча-влак дене) шукта.



А.А.Абатин эше школышто тунеммыж годымак киндеркым, изи шондыкым, книга шөрлыкым, пүкеным, тумбычкым ыштен. Пум пүчкедыше мастар, сүретче Геннадий Куликов дене палыме лиймекше, утларак кумылангын. 1994 ий гыч икшыве-влакым тунукта.

— *Кружокыш 5-11-ше класслаште тунемше ўдыр-рвезе-влак коштыт. Эн ончыч онам пужараш, ягылташ, пум лўдыкшыдымын пўчкедаш, лўмын келыштарыме кўзым чын кучылташ тунемына. Вара совлам, кочкышым пўчкедыме онам ямдылена. Тидлан пистым кучылтына. Тудо пушкыдо. Арвер-влакат*



Фотом усталык пörтын архивше гыч налме.

тыгай лийыт, — ойла Андрей Алексеевич.

Рвезе-шамыч пу гыч пүчкедаш веле огыл тунемыт, түрлө машинам конструиро-

ватлат. Конкурслаш, конференциялаш ушнен, сенышыш лектыт. Ёдыр-влакат почеш огыт код. Мутлан, Валерия Криваксина кугу күкшытыш шуын. Пум түрлө йон дене пүчкеден мошта. Тудын кидешыже чылажат илана. Ёдыр-рвезешамычын пашаштым ятыр ончырыште ужаш лиеш.

— *Кызитсе илышыште кидпашам түрлө машина алмаштен гынат, шке ыштыме арвер нимо деч шерге. Тушто — мекнан шонымашина, усталыкна, чонна. Тидым йоча-влаклан умылтараш да ушыкыштыт курымешлан шындараш тыршем,* — ойла Андрей Алексеевич.

Х.АЛЕКСАНДРОВА.

Кон-кон — марий калыкын ик эн тошто семўзгарже. Тудым кож чыра дене ыштеныт. Иктаж 50 миллиметр кужытан да 20 миллиметр лопкытан чырам пикш семын пўгырген, вольык шоло гыч ыштыме шўртö але вичкыж кўртнывоштыр дене кылденыт.

Марий семўзгар

Шоктымо годым кон-конгын кылжым тўжвакыла савырыман. Чыран ик мучашыжым, умшашке чыкен, пўй дене ишыман. Пурла кидын кошар парняж дене кон-конгын кылжым тарватылме йўкым лукман.

Пөлекыш порылык шынен

Ковам Людмила Аркадьевна Кугу Олыкъялеш шочын. Тудо шөртнө кидан. Пашаже-влакым ончен, чонышто кутешнымаш кумыл ылыжеш. Ковам мом гына түрлен огеш мошто?! Тувырым, шовычым, сўан вургемым ямдыла, курчакым ышта. Нуным лишыл енге, йолташыже-влаклан пөлекла. Курчакше-шамыч дене республикысе конкурс ден фестивальлашке ушна. «Кидпаша чоным лыпландара, куаным пөлекла. Кеч-могай арверым түрлымö годым кумыл сай лийшаш. Енлан пөлекым кучыктымек, порылык тудланат куснышаш», — ойла ковам.



Волжский, Карай.

Елизавета САВИНОВА.

Тоштым саклена

Токтарсола школ кок пачашан. Ик кабинетым тоштер айла. Тудым ИКН-ым, руш йылмым да литературым туныктышо Алевтина Геннадьевна Рыбакова вуйлата. Тоштер кок ужаш гыч шога. Икымшыже пионер йоча ушемын илышыж дене палдара, а вес ужашыштыже сурткөргысö түрлө арверым, вургемым ужаш лиеш. Кугу Ачамланде сарыште лийше-влак нерген поян материалым погым. Тоштерын экскурсоводшо-влак Данил Якимов ден Вика Нагорина йочашамычым тоштер дене кажне тылзын палдарат.

**Родион НЕБОГАТИКОВ.
У Торъял, Токтарсола.**

Конкурсн
учредительже –
«Ший памаш» сылнымут
фонд (вуйлатыше –
писатель Василий
Краснов).

**2023 ийлан «Ямде лий» газет
редакция ден «Ший памаш»
сылнымут фонд
йоча-влаклан «РВЕЗЕ ЙҮК»
конкурсн увертарат.**



Конкурсн тун шоньмашыже:

шочмо йылме, сылнымут пол-
шымо дене самырык авторын чон
арулыкшым аралаш;

шинчымашыжым
кумдандаш;

возымо
усталыкшым вияндаш
йоньм ышташ;

ончыкылык сылнымутчо,
журналист-влакым кушташ.

Тыгай премий-влак пуалтыт:



**Зинаида Яковлева
лүмеш** — журналистикын
түрлө жанрже дене
чолган возен шогышо
юнкорлан.

**Зинаида Емельяновна
Яковлева** 1933-1935 ийлаште «Ямде лий»
газетын редакторжо лийын. Газетын
икымше номерже лекмаште чот тыршен.
1950-1952 ийлаште МАССР просвещения
министрлан пашам ыштен.

Антонов Ивук лүмеш —
почеламутым эн сайын
возышо авторлан.

Самырык поэт **Антонов Ивук**
(Антонов Иван Андреевич)
йоча газет дене пенгыде
кылым кучен. Икымше почела-
мутшо «Ямде лийыште» савыкталтын.
Н.К.Крупская лүмеш Марий кугыжаныш педа-
гогический институтышто тунеммыж годым
газет редкцияште литератур пөлкан
пашажым виктарен.



Валентин Исенеков лүмеш —
школлаше юнкор, литературно-
творческий да сылнымут
кружоклан.

Писатель да журналист **Валентин
Борисович Исенеков** 1967-1988
ийлаште «Ямде лий» газет редакций-
ын серыш-влак да тўшка паша пөлка-
жым вуйлатен. 1970-1980 ийлесе
юнкор-влакын эн кугу йолташышт да
сылнымут туньктышышт лийын.

**Шулдыр Васлий
лүмеш** —
эн онгай мыскарар
возышо юнкорлан.

Шулдыр Васлий
(Василий Васильевич
Крылов) 1991-1997
ийлаште «Ямде лий»
газетын тун редак-
торжо лийын.



**Конкурс 2023 ий
декабрьыште иктешлалтеш.**

**Конкурсн пурышо паша-
влакым жури аклаш тунгалеш.**

Адрес: Йошкар-Ола,
СССР Вооружённый Вийын
70-ше идалыкше урем, 20-шо пөрт.



Алеко Юзыкайн лүмеш —
Марий Эл деч өрдыжтө марий-
влакын тўшкан ылыме кундем-
ласе (Одо, Пошкырт, Татарстан,
Виче (Киров), Свердловск,
Угарман, Пермь) ойыртемалтше
юнкор, литературно-творческий
да сылнымут кружоклан але
авторлан (йочалан).

Пошкырт кундем Краснокам
район Чормак ялын эргыже **Алеко Юзыкайн**
(Алексей Михайлович Юзыкайн) 1969-1986 да
2002-2003 ийлаште «Ямде лий» газетын тун
редакторжо лийын.

Ик юнкор түрлө
танасыште
мастарлыкшым
терген кертеш.

Автор але
кружок 3 ий гыч
конкурсн уэш
ушнен кертеш.

ПОДПИСКЕ

«Ямде лий» газетлан кажне тылзын
15 числа марте почто отделенийыште, podpiska.pochta.ru сайтыште але
«Почта России» мобильный
приложенийыште возалташ лиеш.

Сийлена

Теле толын, йүштө пеш,
Лумжо чүчкыдын велеш.
Кайык-влак моткоч кылмат,
Тамле сий ден сийлыман.

Садланак ме уло еш ден
Ший кормушкым сакышна.
Пөрт окна гыч эскерен,
Киса-влакым ончышна.

Костя ШЕХУРДИН.

Шернур, Кукнур.



Фотом рүдерын архивше гыч налме.

Кажне енлан ешыже, ялже, пүртүсшө шерге. Ме шочмо суртышто икымше ошкылым ыштенна, икымше шомакым ойленна, икте-весым пагалаш, аклаш тунемынна. Ийготыш шудымо-влаклан Морко посёлкысо социал реабилитаций рүдерыште «Моя Родина» квест-модыш эртаралтын. Йоча-шамыч (снимкыште) шочмо кундемым, тудын эртыме корныжым, уста енге-влакым палымыштым тергеныт. «Кайыкат шке пыжашыжым мокта», – маныт калыкыште. Тиде ойым үдыр-рвезешамыч курымешлан шарнен кодыныт.

Н.НИКИТИНА.

Акростих

Йүштө, нерым чывышталын,
Üдыр семын шыргыжеш.
Шөртнын, шийын йылгыжалын,
Түням ош лум леведеш.
Öрмаш, могай пүртүс мотор улмаш.

Костя АНТОНОВ.

✓ Сандалык кум-дыкеш пурса үдалтын.

✓ Могай корка гыч йүаш ок лий?

Тушто.

Калык пале

Вочшо лум йолеш пижеш – шула.

Лöза пöрш – ояр игечылан.

Настя СОЛОВЬЕВАН сүретше.
У Торъял, Токтарсола.



Волжский, Сотнур.

Мастар кид

ТЕАТР ШКЕТАНА

20 январь 18:00 ПРЕМЬЕР
Н.Горькай
ТЕРГЫШЕ
Комедий Режисор

21 январь 16:00
С. Пектеев
ЙЫВАН КЫРЛА. ПУТЁВКА В ЖИЗНЬ
Документальный драме

27 январь 18:00 ПРЕМЬЕР
В. Пектеев
ЙÖРАТЫМАШЫН АКШЕ
Комедий Реклама.

24 январь – Эскимон кечыже.

Кагаз гыч эскимом тодышса.

«Ямде лий» газет
Тун редактор
Л.Н.ГРИГОРЬЕВА.
Индекс: П4696.
Тираж 1550 экз. Заказ
Формат – А-4-8.

https://vk.com/yamde_lii
<https://t.me/yamdelii>
E-mail: yamde_lii@mari-el.ru
(документ кагазлан),
yamde_lii@mail.ru
(автор-влаклан)
Сайтын адресше: yamdelii.ru

УЧРЕДИТЕЛЬ-ВЛАК: Мари-Эл Республикысе культур, печать да калык-влакын пашашт шотышто министерстве, «Кугарня» газет» кугыжаныш унитарный казна предприятий.

Газетым редакцийыште погымо да верстатлыме, «Мари-Эл Республикысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Газетым Кыл, информационный технологий да массовый коммуникаций сферым эскериме шотышто федеральный службын Юл кундем федеральный округысо управленийыштыже регистрироватлыме.
Номер – ПИ № ТУ52-01335,
2021 ий 29 сентябрьыште пуымо.

0+ Печатьыш пуымо жап – 14-00, фактически – 13-00

Авторын да редакцийын шонымышт түрлө лийын кертыт. Серыш-влак мөнгеш огыт колталт. Ак – кутырен келшыме почеш.

Редакцийын да издательнын адресше: 424006, Йошкар-Ола, СССР Вооружённый Вийын 70-ше идалыкше урем, 20-шо пöрт. Тел. 8(8362) 45-22-82(факс).

КОНКУРС



Дарина ПОЛИКАРПОВА.
Кужэгер, Йивансола.



Артём ШАРАБУЕВ.
Шернур, Шүдымарий.



Илья ГОРОХОВ.
Советский, Кельмаксола.

Конькин мужыржым муза.



Мый дечем мынар шольо-шүжарет уло манын йодыт гын, манам: «Мыйын – ик шүжарем, ик шольым». А кунам шүжарем деч йодыт, тудо ойла: «Мыйын – ик изам да ик шольым». Ача-аван мынар йочашт уло?

Фигур олмеш
числа-влакым
шындыза.

$$\text{circle} + 12 = \text{triangle}$$


$$\text{square} : \text{triangle} = 7$$

$$\text{triangle} - 5 = \text{hexagon}$$

$$4 \cdot \text{hexagon} = 100$$



**Лум пырчын
чын ўмылжым
кычалза.**



42-31-43, 51-56-56, 75-89-75 телефон номер-влак дене йынгырте – калык-мутым луд.

Н.ТОКТАРОВА ямдылен.

Анаграмме

Руш классик Л.Н.Толстойын «Война и мир» романыштыже вашлиялтше ола, имень ден усадьбе-влакым палыза:

ырес + оГЫЛ + ы =
тОра + ден + о =
вучо + ора + г + Б + о =
Смс + колен =
уста + ире + ц + л =

«Русская словесность» кружокын енгже-влак.

Волжский, Сотнур.

Интернетысе сўрет-влакым кучылтмо.

3

Кумытан числа дене «ошкылын», лабиринтым эртыза.